

ՄԱՏԹԵՈՍ ՄԱՄՈՒՐՅԱՆԻ ԱՆՉԱՅՏ ԾԱԾԿԱՆՈՒՆԸ

Մ. Ն. ՀԱԿՈԲՅԱՆ

Ուսումնասիրությունը ցույց է տալիս, որ արեմտահայ գրող, ականավոր հրապարակախոս խմբագիր, թարգմանիչ ու մանկավարժ Մատթեոս Մամուրյանը, Վրույր և հետագայում՝ Շահնուր հանրահայտ ծածկանուններից բացի, հրապարակախոսական գործունեության սկզբնական շրջանում հանգես է եկել նաև Աշոտ ծածկանունով: Այս ծածկանունն առաջին անգամ հանդիպում է Զմյուռնիայում 1860 թ. հրատարակված «Միություն» դեմոկրատական հանդեսի հուլիսի 15-ի համարում: Արձագանքելով հանդեսի 5-րդ համարում տպագրված Ղ. Մամուրյանի «Աղջկանց դաստիարակության վրա դիտողություն մը» հոդվածին, Աշոտը հուլյս է հայտնում, որ նրա հեղինակը կշարունակի իր դատողություններն իգական սեռի դաստիարակության շուրջը՝ կանանց դաստիարակության խնդիրը համարելով «մեծ ազգային հառաջդիմության աղբյուրը»: Արտակարգ սրությամբ է օժտված Աշոտի նամակը՝ նա գտնում է, որ աղջիկների դաստիարակությանը լուրջ նշանակություն շտալու պատճառով ընթանում ենք դեպի մի «անել բավիղ և կորստյան կղիմենք»: Բայց և զգուշացնում է, որ աղջիկները, օտար քաղաքներում կրթություն ստանալով, օտարանում են ազգից, նույնիսկ իրենց նախնիներից, դառնում են աշխարհաքաղաքացուհիներ: Դրա պատճառն այն է, որ «կօրինակենք վատորեն եվրոպականին արտաքին զարդն, պաճուճանքը, ցույցն ու շպարը»: Ազգային դիմագիծը կորցնողներին համարելով «մարդանման կապիկ», Աշոտը գտնում է, որ իգական սեռի դաստիարակության խնդիրը պետք է լինի՝ աճեցնել այնպիսի աղջիկներ, որոնք «հայրենասեր մայրեր լինին և իրենց զավակաց մայրական կաթով հարենասիրական ոգին ջամբեն»: Հայ աղջիկների պարծանքը պետք է դառնա ազգի բարոյական աճին ու դաստիարակությանը նպաստելը: Հեղինակի հիմնադրույթն է՝ «Ամբողջ ազգ մի կրնա կենդանանալ և կանգնիլ կանանց ձեռքով... տանտիկին՝ մեր ընտանյաց և հայրենյաց զարդն ու մխիթարությունն է ու պահպան հրեշտակուհին է», նրա միջոցով սերնդից սերունդ է փոխանցվում «առաքինությանց անմոռաց հիշատակը, որ... կենդանի հրահանգիչ մ'է»¹: Ազգային հատկանիշները կորցնող օրիորդն, ի վերջո, դառնում է «փետած հավ»:

Նամակի հեղինակն, այդպիսով, վեր էր հանում ու դատապարտում մի անողորմ ճշմարտություն՝ օտարամոլությունը, որ տարածում էր գտել Զմյուռնիայի և Կ. Պոլսի հայության, մասնավորապես իգական սեռի շրջանում: Գերադասելով հանդես գալ ծածկանունով, Մամուրյանը միաժամանակ քողարկում էր այն փափուկ հանգամանքը, որ արձագանքում էր իր եղբոր՝ Ղուկաս Մամուրյանի հոդվածին: Սակայն վերջինս, «Միության» մեջ հրատարակելով նամակը, նախաբանում նշել է, որ նրա հեղինակն իր բարեկամն է: Այդ հիշատակությունն արդեն ենթադրել է տալիս, որ նամակի հեղինակը հավանաբար Մ. Մամուրյանն է: Այդ ժամանակ նա Կ. Պոլսում վարում էր պատրիարարանի դիվանապետի պաշտոնը, միաժամանակ աշխատակցում էր մամուլին, մասնավորապես «Միության» էջերում շարունակաբար հրատարակում էր «Անգղիական նամականին»:

Շատ շանցած Աշոտը հանդես է գալիս խափանված «Միություն» հանդեսի շարունակությունը կազմող և հավելյալ անունով լույս սևեռող «Միություն սահմանադրականի» էջերում: Այս հանդեսի հենց առաջին՝ 1861 թ. սեպտեմբերի 1-ի համարից սկսած տպագրվում է «Սահմանադրություն» ընդհանուր

¹ «Միություն». 1860, N 8, էջ 108—109:

վերնագրով անստորագիր հոդվածը, որի շարունակությունը լույս է տեսնում 6-րդ, 8-րդ, 9-րդ 13-րդ համարներում, հավանաբար նաև հետագայում, որ հնարավոր չէ ճշտել հանդեսի հավաքածուի լուսատիպը թերի լինելու պատճառով, Անստորագիր հրատարակվելով հանդերձ, հոդվածաշարքի շորրորդ հատվածը, սակայն, կրում է Աշոտի ստորագրությունը, որը կարծես թե գրվել է վրիպմամբ։ Դա էլ օգնում է ճշտելու, որ արևմտահայ Աղգալին սահմանադրության էությունը քննող և «շարունակելի» նշումով լույս տեսնող հոդվածաշարքի հեղինակը միևնույն անձնավորությունն է, որ հանդես է գալիս հիշյալ ծածկանունով։ Հոդվածաշարքն ընդհատումներով հրատարակելը նույնպես հուշում է, որ նրա հեղինակը զմյուռնաբնակ չէ, որ այն գրվել է հատված առ հատված։ Դա ակնառու է դառնում նաև խմբագրության երկու ծանոթագրությունից, որոնք հաղորդում են հոդվածաշարքի տպագրությունը «ակամա» և «քանի մը պատճառով» ուղանալու մասին²։

Միամյա տարեշրջանը բոլորելուց հետո «Միություն սահմանադրականը» 1862 թ. օգոստոսին դադարեց հրատարակվել։ Բայց Աշոտ ծածկանունը երևաց դարձյալ Զմյուռնիայում լույս տեսնող «Ծաղիկ» դեմոկրատական հանդեսում։ Այս անգամ նա արդեն նշում է, որ գրում է Կ. Պոլսից, թեման կրկին Աղգալին սահմանադրությունն է և նրա շուրջը տեղի ունեցող հասարակական եռուզեռը։ «Ծաղիկի» 1862 թ. օգոստոսի 1-ի համարից հետո նա հանդես է գալիս ևս չորս ամիսով՝ օգոստոսի 15-ին, 20-ին, սեպտեմբերի 10-ին և 20-ին՝ միևնույն թեմայով և միևնույն վերնագիրը կրող հոդվածաշարքով՝ «Սահմանադրություն»³։

Համագրելով այս հոդվածաշարքը «Միություն սահմանադրականում» նույն խնդիրներին նվիրված հոդվածաշարքի հետ, ակնառու է դառնում, որ դրանք պատկանում են միևնույն հեղինակին։ Դրանց ելակետը, սկզբունքները, առաջադրած ուղեգիծը, լեզուն ու ոճը, երբեմն էլ արաւահայտությունները նույնն են։ Ավելին, տարբեր հանդեսներում հնգամսյա ընդմիջումով լույս տեսած այդ հոդվածաշարքերը լրացնում են միմյանց, «Ծաղիկի» հոդվածագիր Աշոտը շարունակում է «Միություն սահմանադրականի» նույնանուն հեղինակին, զարկացնում նրա դադարի արձանները։ «Ծաղիկում», սակայն, հեղինակը ստորագրում է հոդվածաշարքի յուրաքանչյուր հատվածը՝ Աշոտ։

Աշոտը հանդես էր գալիս նաև Կ. Պոլսում հրատարակվող հայ պարբերականների էջերում։ Հենց 1862 թ. սեպտեմբերին, օրինակ, նա «Կիլիկիա» հանդեսում նույն այդ ծածկանունով տպագրել է «Սահմանադրություն» հոդվածը⁴, որը և անմիջապես արտատպել է «Ծաղիկը», իսկ նրանից հետո նաև «Գարուն Հայաստանի» հանդեսը՝ հենց միևնույն տպարանում տպագրվող «Ծաղիկի» շարվածքից⁵։ Այդպիսով, այդ երեք հանդեսները համերաշխվում էին Աշոտի այն մեկնության հետ, որ տրվում էր Կ. Պոլսում 1862 թ. օգոստոսի առաջին օրերին տեղի ունեցած ժողովրդական ցույցին՝ ի պաշտպանություն Աղգալին սահմանադրության և ընդդեմ պատրիարքարանի ու աղգալին գործիչների այդ խնդրում դրսևորած դիրքի, բացահայտում էին այդ առթիվ տեղի ունեցած լայնածավալ հուզումներն ու նրա հնարավոր հետևանքները։

Սակայն որքան էլ նույնանում են Աշոտ ծածկանունով տարբեր հանդեսներում տպագրված նյութերի բնույթը և Մ. Մամուրյանի ստորագրությամբ հրատարակված հոդվածների ընդհանուր դիմագիծը, այսուհանդերձ, դրանք դեռևս լիարժեք կովան չեն Աշոտը Մ. Մամուրյանի ծածկանունը համարելու համար։ Այդպիսի անհրաժեշտ կովան, մի քանի տարի հետո՝ 1867-ին, արդեն շատ որոշակի և ուղղակի տալիս է հենց Մամուրյանը։

² «Միություն սահմանադրական». 1861, № 6, էջ 41. 1862, № 13, էջ 97։

³ «Ծաղիկ». 1862, № 40, էջ 329—332, № 41, էջ 337—339, № 42, էջ 345—347, № 44, էջ 361—365, № 45, էջ 369—372։

⁴ «Կիլիկիա». 1862, № 9, էջ 97—103։

⁵ Տե՛ս «Ծաղիկ». 1862, № 44, էջ 361—365 և «Գարուն Հայաստանի». 1862, № 14, էջ 105—109։

1864 թ. վերջերից Մ. Մամուրյանը առավել ակտիվորեն է աշխատակցում Գր. Զիլինկիրյանի «Ծաղիկին»՝ վայելելով խմբագրի կատարյալ վստահությունը և սկզբունքային գիտակցությունը: «Ծաղիկում» նա սկսում է հրատարակել «Հայկական նամականիս», որը շարունակում է լույս տեսնել մինչև հանդեսի դադարելը: Դրանից, ինչպես և այլևայլ հարցերի նվիրված հոդվածներից բացի Մամուրյանը «Ծաղիկի» էջերում Մ. Մ. ստորագրությամբ հրատարակում է «Ազգային սահմանադրություն» վերնագրով նոր հոդվածաշարք⁶: (Ի դեպ, էնթադրում ենք, որ նա այդ Մ. Մ. և Վրույր ծածկանուններից բացի «Ծաղիկում» հանդես էր դալիս նաև Մ., Վ., Մ. Հրանտ, թերևս նաև այլ ծածկանուններով): Եվ ահա այդ հոդվածաշարքի երրորդ հատվածում քննելով Ազգային սահմանադրության անհրաժեշտության և օրինականության խնդիրը, Մ. Մ.՝ Մամուրյանը գրում է. «Արդեն ասկից հինգ տարի առաջ Սահմանադրական Միությունը հանդիսին մեջ Սահմանադրության վրա գրելու առթիվ բաժ էինք թե...» և ապա քաղում մի հատված: Ծանոթագրությամբ նա ընթերցողին հղում է՝ «Միությունը սահմանադրական, 1862, թիվ 9»⁷:

Հայրենական գրապահոցներում «Միություն սահմանադրականի» հավաքածուն չի ենելու պատճառով մինչև հիմա հնարավոր չէր պարզել, թե նրանում տպագրված ինչ հոդված նկատի ունեն Մամուրյանը: Այժմ, երբ մեր ձեռքի տակ կա այդ հանդեսի 18 համարների լուսատիպը, պարզվում է, որ խոսքը «Միություն սահմանադրականի» 9-րդ համարում (էջ 65—68) տպագրված «Սահմանադրություն» հոդվածաշարքի շորորոգ հատվածի մասին է, որը և ստորագրված է Աշոտ: Համադրումը պարզում է, որ «Ծաղիկում» Մամուրյանը սրբագրումով երկու հատված է քաղել «Միություն սահմանադրականի» նշված համարի էջ 66-ից: Ահա այդ մեջբերումների և հինգ տարի առաջ լույս տեսած հոդվածի համապատասխան սկզբնամասերը.

«Սահմանադրությունը ի վաղուց անտի ազգային թե՛ կրոնական և թե՛ քաղաքական իրավանց վրա հիմնյալ և...» և այլն: Ապա՝ «Սահմանադրությունը օրինակեց, ամփոփեց և մարմնացուց այն ընտանի և...» և այլն: («Ծաղիկ». 1867, № 140, էջ 619)

«...Սահմանադրական կանոնը:—Ի վաղուց անտի ազգային թե՛ կրոնական և թե՛ քաղաքական իրավանց վրա հիմնյալ, և...» և այլն: Ապա՝ «Սահմանադրությունը օրինակեց, ամփոփեց և մարմնացուց այն ընտանի և...» և այլն:

(«Միություն սահմանադրական». 1862, № 9, էջ 66)

Այսպիսով, իր՝ Մ. Մամուրյանի հաստատուն վկայությամբ սլարզվում է, որ Աշոտ ծածկանունով նա հանդես էր գալիս «Միություն սահմանադրականի» էջերում, որ Աշոտը նրա ծածկանունն է: Ըստ որում, «Ծաղիկում» տպագրված հոդվածաշարքով նա շարունակում էր իր մտորումները, որոնք տարիներ առաջ ընթերցողին էր ներկայացրել «Միություն սահմանադրականի» էջերում՝ դարձյալ սահմանադրության շուրջը: Ծածկանվան այս բացահայտումը հնարավորություն է տալիս անվանի հրապարակախոս խմբագիր Մ. Մամուրյանի վաղ շրջանի գործունեությունը և մտահայեցությունը քննել ավելի մեծ թվով և իրենց բովանդակությամբ առավել հարուստ նյութերի հիման վրա: Դրանով երիտասարդ հրապարակախոսի գործունեությունը, որ, ի դեպ, կարոտ է ուսումնասիրության, հայաստանի շահով լայնանում է, ամրապնդվում շահեկան գործունեությամբ՝ նրա գաղափարական աճը և հայացքների զարգացումը երևան հանելու համար:

Այժմ ընդհանուր գաղափար տանք Աշոտ-Մամուրյանի նախ «Միություն սահմանադրականում», ապա «Ծաղիկում» միևնույն խնդրի շուրջը և միևնույն խորագրով («Սահմանադրություն») հրատարակած երկու հոդվածաշարքի մասին: Ժամանակի առումով այդ երկու հոդվածաշարքը չեն համընկնում և

⁶ «Ծաղիկ». 1867, № 135—137, 140—141:

⁷ Նույն տեղում. 1867, № 140, էջ 619:

Ռիմանցից բաժանված են հնգամսյա ժամանակահատվածով: Բայց ըստ էության ունեն օրգանական ընդհանրություն և միևնույն նպատակն են հետապնդում՝ հիմնավորելով Ազգային սահմանադրության կենսական անհրաժեշտությունը արևմտահայերի համար և նպատակասլացություն հաղորդել սահմանադրական պայքարին:

Երկարատև սլաքարից հետո 1860 թ. մայիսի 24-ին Ազգային ժողովի աստատությանն արժանացած սահմանադրության շուրջը, ինչպես հայտնի է, նոր է բուռն պայքար ծավալվեց: Օգտվելով դրանից, սուլթանական կառավարությունը նախ արգելեց սահմանադրությունը, ապա հիստ վերաբնություններին ու անդամահատումից հետո, վերջապես 1863 թ. մարտի 17-ին վավերացրեց և այն պաշտոնապես սկսեց կիրառել: Մամուրյանի հողվածաշարքերը նվիրված են հենց այդ պայքարին՝ նրա առավել լարված ժամանակամիջոցին՝ 1861 թ. սեպտեմբերից 1862 թ. սեպտեմբեր: Աշոտ-Մամուրյանը ակտիվ ու բացահայտ դրույց է վարում ենթադրվող բարեկամի հետ, նրա, որ հերքում է սահմանադրության դերն ու նշանակությունը և իր սուր ու դիպուկ նկատողություններում մեկտեղում է սահմանադրության նկատմամբ թերահավատության և զրկման թուրքի փաստարկները: Մի շարք առումներով մերժելով սահմանադրությունը, հակադրվող ընդդիմախոսը եզրակացնում է. «Ասի ալիսիսի ճոխ ու պերճ կահ մ'է, որ գավառի հայուն աղքատիկ տնակին մեջ ոչ տեղ ունի և ոչ արկավորություն: Ուրեմն սահմանադրությունը մեռյալ օրենք մ'է և միայն յանի շինողներուն մտաց մեջ կենդանություն ունի»⁸:

Հերքելով հոռետես բանավիճողի փաստարկները և այդ ձևով ընթերցող հասարակությանը և ժողովրդական խավերին պարզաբանելով սահմանադրության իմաստը, Աշոտ-Մամուրյանը յուրաքանչյուր հայի ներարկում է այն գաղափարը, որ եթե նա կա, ապա գոյություն ունի նաև Հայաստանը: Այդ ելակետից էլ հրապարակախոսը հիմնավորում է հայրենասիրության և հայի քաղաքացիության կենսական անհրաժեշտությունը՝ իբրև ժողովրդի ազատության և գոյատևման իրավունքի գլխավոր պայմանի: Ազգասիրությունը, գրում է նա, «... միայն ազգային գոյության գործարար ապացույց մ'է, այլ անոր հառաջադիմության անդիմադրելի մղիչ մը»⁹: Իսկ սահմանադրությունը հայության համար բնական է և նրա «զին նույնքան հին է, որքան ինքն ազգը. «Սահմանադրությունը ձև, կեղծարար և կենդանություն տվավ այն իրավանց և սկզբանց, որոնց ազգը թեև տեղյակ էր, կաղն ի կաղ կհետևեր», մեկտեղեց այն կանոնները, որոնք պետք է օգնեն իրագործելու ազգային նպատակները: Այսուհետև նա կնպաստի «ազգային տառապանքների» թեթևացմանը, նաև վերջ կտա ինքնիշխան տնօրինություններին և նրա սկզբունքով բնաշխարհ մարմինները հասարակության առջև հանգրվանապես պետք է լինեն. «Ահա այս է սահմանադրության ուսմկական իմաստը»:

Մամուրյանի նպատակը սոսկ սահմանադրության անհրաժեշտության և ժողովրդին նրա հարադատ լինելու հիմնավորումը չէ: Այդ գաղափարը պրոպագանդելու համար նա կարիք չունի ծածկանունով հանդես գալու: Մի կողմից պատրիարքարանի դիվանապետի պաշտոնում գտնվելը, մյուս կողմից ժողովրդին իր անելիքները հուշելու անհրաժեշտությունը ստիպում էին նրան խուսափել սեփական ստորագրությամբ հանդես գալուց: Եվ դա ակնառու է դառնում նրա հողվածաշարքի «Միություն սահմանադրականի» 1862 թ. հունվարին և մարտին հրատարակած հատվածներից: Գտնելով, որ սահմանադրությունն իբրև ժողովրդի հավանությանն արժանացած օրենք «հարատև գործադրելի է», Մամուրյանը չի անգիտանում, որ սահմանադրությունն ունի վտանգավոր հակառակորդներ, որ նրա դեմ գործում են խաչակիր և նշանակիր դավաճաններ և ապստամբներ: Սակայն կա նրանց հակադիր մի ուժ, որի դեմ անզոր են բոլոր հակառակորդները: Դա է «ազգին անդրդվելի կամքը, անսասանելի իրա-

⁸ «Միություն սահմանադրական». 1861, № 1, էջ 4:

⁹ Նույն տեղում, № 6, էջ 43:

վունքը», որը «պիտի արթննա ժամանակին: Առյուծի պես պիտի գոռա ու ճըշմարիտ և գորովալիք մոր պես իր հարազատը, իր ծնունդը, իր սիրական սահմանադրությունը անփոփոխ և անթերի պիտի պահանջե...»: Ժողովրդի գործության նկատմամբ այս հավատով ու նրա տրամադրությանը լավատեղյակ լինելով, հեղինակը սխալ է համարում այն պնդումը, թե հարկ է սահմանադրական «իրավունքը կես բերնով» պահանջել, այլ խոսքով՝ վիզ թեքել կառավարության առջև: Նա գտնում է, որ գերադասելի է «առաքինի, արի, գեղեցիկ, պայծառ» ուղի բռնել և ինչ անվեհերությամբ հռչակվեց սահմանադրությունը, նույն «անվեհեր ոգովով պիտի պաշտպանենք անոր գոյությունը»: Բացելով փակագծերը, Մամուրյանը տեղեկացնում է, որ «անարատ և անմեղ կույս» սահմանադրությունը զրպարտվել է և «թշվառ կույսը բանտ դրվեցավ և հիմա մարմնազնին կորովի անձանց քննության ներքև է»: Բայց դա չի խանգարի նրա երևան գալուն, եթե, իհարկե, «քննիչը վանականաց հետ խոսքը մեկ ըրած չեն»: Ուրույն այս ահազանգից հետո նա վստահություն է հայտնում, որ «ազգային օրինավոր կամքով» լիովին հնարավոր է «անհատ և անթլպատ պահել, պաշտպանել» սահմանադրությունը:

Իր միտքը և գաղափարները բացահայտ արտահայտելու փորձություն չունենալով, Մամուրյանն, այդուհանդերձ, ակնարկում է ֆրանսիական հեղափոխությունները և շեշտում հասարակական շարժման օրինաչափությունը, վկայակոչում է Ռ. Բեկոնին ու Ժ. Մինելին, որպեսզի հասկացնի, որ ժողովուրդը լի է իր կամքը գործադրելու անկասելի վճռականությամբ: Այլաբանության դիմելով՝ նա նկատում է. «Ծովուն տխուր հանդարտությունը ալեկոծության նշան է»¹¹: Իր իրավունքների ու շահերի դիտակցումով «գառնամիտ ժողովուրդը» «հանկարծ կտեսնես... նոր կենդանություն մի առեռ է... հոն և հոս կտարուբերի, կերերա, կշարժի, նոր հույս, նոր երջանկագույն ապագա մը որոնելու կսկսի», — այս թափանցիկ ակնարկներին Մամուրյանը նաև խստորոշ զգուշացումով ավելացնում է. «խոսելու և շարժելու ժամը մոտալուս է, և եթե երբեք սահմանադրական սրբանվեր իրավանց դեմ դավ կամ նենդ նշմարվի, պիտի տեսնես, որ մեր խոսքը զորավոր և մեր շարժումները ազդու և հրամայական պիտի լինին»¹²: Հողվածաշարքի մեղ անհայտ մնացող հատվածում Մամուրյանը, հավանաբար, խոսում է այն մասին, թե կոնկրետ ինչ է հարկավոր անել լատոված Ազգային սահմանադրությունը վերանվաճելու համար: Անկախ դրանից նա, ինչպես ակնառու է, արդեն ուրույն ձևով հուշել է, որ հարկ է վճռական միջոցների դիմել և փրկել «կորովի անձանց քննության» տակ գտնվող սահմանադրությունը:

Վեց-յոթ ամիս անց՝ 1862 թ. սեպտեմբերին «Միություն սահմանադրականը» դադարեց լույս տեսնել: Մինչ այդ, 1861 թ. հուլիսի 1-ից, արդեն ասուլարեզում իշխում էր «Ծաղիկ» դեմոկրատական հանդեսը՝ Գր. Զիլինկիրյանի և Ա. Հաչկունու խմբագրությամբ: Մի տարի հետո ստանձնելով հանդեսի՝ Պոլսի գործակալի պարտականությունները, Մ. Մամուրյանը շուտով սկսեց հանդես գալ նրա էջերում՝ դարձյալ ծածկանուններով: Առաջին իր հրապարակումները նա նորից նվիրում է սահմանադրությանը՝ նույն ստորագրությամբ՝ Աշոտ: Այս անգամ նա շարունակում է արժարժել իր այն գաղափարները, որոնք արտահայտել էր «Միություն սահմանադրականում»՝ կարծես թե ուղղակի շարունակելով իր ընդհատված խոսքը:

Աշոտ-Մամուրյանի «Ծաղիկում» տպագրված անդրանիկ ելույթի առանցքը Կ. Պոլսի հայությանը աչրող հարցն է՝ «Սահմանադրութենե ի՛նչ լուր ունի»:

10 Նույն տեղում. 1862, № 9, էջ 67—68:

11 Նույն տեղում, էջ 68:

12 Նույն տեղում. 1862, № 13, էջ 98, 99:

Պատասխանը կտրուկ է. սահմանադրությունը չի հաստատվի, քանի դեռ «ափի բերան և դանդաղ նստեր ենք, փոխանակ դործելու»¹³: 1862 թ. հուլիսի 18-ին Կ. Պոլսից Մամուրյանի գրած նամակը «Ծաղիկում» լույս է տեսել օգոստոսի 1-ին՝ Հենց այն օրը, երբ Կ. Պոլսի աշխատավորական զանգվածները դեմոկրատական երիտասարդության գլխավորությամբ հանդես բերեցին իրենց անախադես պնդականությունը՝ ի պաշտպանություն սահմանադրության, ընդդեմ նրա հակառակորդների և ազգային պատրիարքարանի, որ երկշտություն էր դրսևորում սուլթանական կառավարության առջև, վճռաբար չէր պայքարում սահմանադրության շուտափույթ վավերացման համար: Ժողովրդական խավերի այն վճռականությունը, որ պեսք է դրսևորվեր երկու շաբաթ հետո, Մամուրյանը կուսում էր ամենայն ճշգրտությամբ և այդ մասին գրում Քաջահայտ ձեվով: Քննելով սահմանադրության «երկրորդ գալստյան» երկարատև ձգձգման պատճառները, Մամուրյանը վարպետ գրչով ներկայացնում է հասարակական տրամադրության «մանրանկար պատկերը»: Ահա ինչպես է նկարագրում Մամուրյանը գեոիշխող տրամադրությունը. «Ծեծ ուտել և լուել ատեն մը հայուն Հակատաղիրն էր. սահմանադրություն մը հաստատել և ջնջել հիմարություն [է], բայց զայն վերանորոգել և անոր վավերացման հավիտյան սպասել նույնիսկ վատություն է, բառին ընդհանուր առմամբ: Մինչև ե՞րբ սպասել և մեր իրավանց վրա աչք գոցել պետք է: Աղգին տունը կփլի, անոր շունչը կկտրի, չազգային վարչություն մը մեր գլխին վերևը կխրոխտա, մոտավոր, մանավանդ հեռավոր հալք անիշխանության մեջ կլլկին, կփարատին, լեռն լեռ կթափառին, արյուն կուլան և բավական չէ, և մենք դեռ սպասե՞նք: Բավական չե՞ն մեր բուշած տառապանքը, բավական չեղա՞ն մեր ըրած զիջումները, բավական չեղա՞ն սոցալին անարատ սահմանադրության կրած օտարոտի և պիղծ այլալությունները, և դեռ կուղեն որ վատաբար համբերենք: Զէ՛, չէ՛, ա՛լ մեր համբերությունը հատավ, հատավ մեր հոգին, հատա՛ն մեր ոսկերքը: Համբերությունը և հլությունը շունին վարձք այս աշխարհիս վրա. հանդգնությամբ և անվեհերությամբ պարտինք կորուլել դանդաղության, շարակամության մեզ զլացածը: Մինչև որ չի բողոքենք, մինչև որ չստիպենք և ի հարկին մեր բազուկը... մի միայն մեր թշնամիներն են որ...»¹⁴:

Փորը-ինչ աղատությունից հետո Մամուրյանի գրիչը կրկին կաշկանդվում է ու նա դիմում է բազմակետի «լեզվին», բայց այդ նույն օրն էլ՝ օգոստոսի 1-ին, Կ. Պոլսում ժողովուրդն արդեն խոսում էր իր բացարձակ լեզվով. նա, ինչպես գրում է Աշոտ-Մամուրյանը «Ծաղիկի» հաջորդ՝ օգոստոսի 10-ի հուլիսում, «բռնապես խառն ժողովը լուծեց և պատրիարքառանք փակեց, եղելություն մը, որուն հայտնի հանդիմանական նպատակը սահմանադրության հարություն տալ է»¹⁵: Մամուրյանը մանրամասնորեն պատմում է օգոստոսի 1-ին տեղի ունեցածը՝ համարելով այն «ազգային հեղափոխական վիճակին երրորդ շրջանը»՝ 1860 թ. մայիսի 24-ից և 1861 թ. օգոստոսի 21-ից հետո: Ինքը հեղինակն էլ, ծանրապես խորհրդածելով կատարվածի շուրջը, գտնում է, որ ժողովուրդը սահմանադրության համար բողոքելու իրավունք ունի «չէ թե հազար, ալ տաս հազար հոգով», որ նա միշտ էլ բողոքելու իրավունք ունի: Սակայն նա կողմնակից չէ «ծայրահեղ միջոցների» դիմելուն և արձանագրում է, որ

¹³ «Ծաղիկ». 1862, № 40, էջ 330:

¹⁴ Նույն տեղում: Այս համալսածը՝ աղբյուրի ոչ ճիշտ նշումով, վրիպակներով ու անհարկի հապավումներով Հ. Ղազարյանը վերագրել է Գ. Զիլինկիյանին (տե՛ս Հ. Ղազարյան. Գրիգոր Զիլինկիյան. Երևան, 1959, էջ 82—83):

¹⁵ «Ծաղիկ». 1862, № 41, էջ 337:

«օգոստոսի մեկին դեպքը անախորժ տպավորություն մը ունեցավ ազգին մեծագույն մասին վրա»։ Ակնառու է, որ ընդհանուր երկյուղը, որ ծագել էր սահմանադրությունը կորցնելու վտանգից, բաժանում է նաև Մամուրյանը։ Նա դաժնում է, որ այնուհետև ազգը «շատ պիտի հոգնի, քրտնի և երանի՝ թե միայն քրտինք թափելով հասնեն իր փափաքին...»¹⁶։

Օգոստոսի 1-ին Կ. Պոլսում տեղի ունեցած ժողովրդական ցույցին Մ. Մամուրյանն ընդարձակորեն է անդրադառնում և իր կարծիքն ավելի որոշակի արտահայտում «Կիլիկիա» հանդեսում 1862 թ. սեպտեմբերին տպագրած հոդվածում՝ դարձյալ Աշոտ ծածկանունով։ Նրա այդ հոդվածը արտատպեցին «Մաղիկ» և «Գարուն Հայաստանի» հանդեսները¹⁷։ Այս անգամ Աշոտ-Մամուրյանը բացառում է Բ. Դոան իրավասությունը փոփոխել ազգային կանոնադրությունը՝ սահմանադրությունը, քանի որ այն հենված է ազգային կրոնի, ազգային էության և էության ու բարքերի վրա։ Կառավարությունը, նրա կարծիքով, միշտ մնում է այն բանից հետո, երբ սահմանադրության հակառակորդները սկսեցին «խլրտել և մեքենայել» և առիթ տվեցին Բ. Դոանը, որպեսզի խափանի սահմանադրության գործադրությունը։ Դրա հետևանքով էլ «երկու անհավասար բանակներ ճակատ առ ճակատ կեցան և տեսակ մը քաղաքական պատերազմ սկսավ գրիչ շաղկապով... նյութական ուժը միայն կարող էր դաշն վճռել... Գործը այն աստիճանի հասած էր, որ ազգին մեկ մասը մյուսին հետ չէ թե գրչով, խորհրդով պիտի խոսեր, այլ զենքով, և հաղթող կողմը մյուսը չուր պայմաններուն պիտի ենթարկեր»¹⁸։

Աշոտ-Մամուրյանի բանաձևը՝ «դինական հեղափոխություն մը պետք էր», բացահայտում է խնդրի հանդուցալուծման միակ ելքը, որին, սակայն, ազգը դիմել չէր կարող, քանի որ «ազգը Օսմանյան տերության հպատակ և օսմանյան հողին մեջն էր»։ Այդ պատճառով խնդիրը հանգեց կառավարության միջամտությանը՝ նրան, ինչին ձգտում էին սահմանադրության հակառակորդները և մատնիչները, որ ազգային պարզ կանոնադրությունը «իբրև ոճրագործություն մը, ապստամբական գործ մը» համարեցին ու հռչակեցին։ Նրա կարծիքով ժողովրդի կտրուկ և զանգվածային քայլերը, «օգոստոսին մեկին դեպքին ներքին պարագաները» ցույց են առնում, «թե բողոքարկու ամբոխը ըրածը դրածը չգիտե...»։ Ստեղծված իրադրությունը, մանավանդ ազգի անմիաբան լինելը ստիպում են նրան հանգելու այսպիսի հետևության։ «Ուստի կմնա, որ ազգը իր բնական շրջանին մեջ մտնե, իր օգուտը, իր իրավունքը, իր ապագա բարօրությունը ճանչնալով, հոգովով սրտով միաբանի, որպեսզի ազգային սահմանադրությունն ալ իր տեղը գա»¹⁹։ Այլ խոսքով նա, «տաք և թեթև գլուխներին» հակադրվելով, նկատում է, որ «խոստորնակ և աննպատակ ընթացք» չի տա ցանկալի արդյունքը, «անիշխանական միտումները» հեռու չեն տանի։ «Ազգին այս թշվառ և ցավալի վիճակին միակ և ապահով դարման մը կա, այն դարմանն է՝ հաշտություն և միաբանություն, — գրում է Աշոտ-Մամուրյանը և ցույց տալիս այն օրինակը, որին պեսք է հետևել։ «Հուլիները ընդհանրապես իրենց մեջ միշտ կռիվ ունին. սակայն երբ արտաքին թշնամին տեսնեն, ղիփար կգրկեն, կմիանան, ու ոսոխը խորտակվեն ետև՝ զենքը վար կղենեն ու նորեն կսկսին իրենց վիճաբանությունը... պետք է իրարու անդադար ըսենք Աթենա-

¹⁶ Նույն տեղում. 1862, № 42, էջ 347։

¹⁷ «Կիլիկիա», 1862, № 9, էջ 97—103։ «Մաղիկ», 1862, № 44, էջ 361—365։ «Գարուն Հայաստանի», 1862, № 14, էջ 105—109։

¹⁸ «Մաղիկ», 1862, № 44, էջ 362—363։

¹⁹ Նույն տեղում, էջ 363, 364։

քիին սա խոսքը՝ «զա՛րկ, եղբայր, բայց մտիկ ըրե՛», և այս պայմանավ միայն կրնանք աղատիլ այն սոսկալի կործանմանե, ուր մեծաքայլ կղիմե Ազգը...»²⁰:

Աղոտ-Մամուրյանի՝ սահմանադրությանը նվիրված մտորումներում ազնառու է նաև մի որոշակի միտում. սահմանադրական ոգին հիմնավորել ազգի անդյալի պատմությամբ, ազգային կրոնի սկզբունքներով ու ամանդներով: Նա ուղղակի գտնում է, որ սահմանադրությունն անկասելի է, որ ժողովուրդը չի հանդուրժի նրա խափանումը: Ծածկանունով հրատարակված իր վերջին՝ «Սահմանադրություն» հոդվածում, որ «Ծաղիկից» արտատպեցին «Գարուն Հայաստանի» հանդեսը և «Մեղուն»²¹, Մամուրյանը բռնում բանավեճ է մղում «Մասիսի» նամակագրի դեմ, որը «ազգային հեղափոխության» ներքին պատճառները որոնելով. սահմանադրության կործանման պատճառը համարում է «յրագրաց անկանոն աղատությունը»: Այդ առթիվ էլ նա հարկ է համարում ընդգծել, որ «պատմության գործն է բացե ի բաց և անաչառ ոգով հետազոտել և մանր կշռել սահմանադրության ծագման, կարճատև գործադրության և մանավանդ անոր անկման նախորդ և հարակից պարագաները»²²:

Պատահաբար չէր Մամուրյանը հատուկ հոդված նվիրում «Մասիսում» (№ 546) հրատարակված նամակին: Նրա հեղինակը ուրույն ձևով մեկտեղել էր հակասահմանադրական այն միտումները, որոնք դրսևորվել էին նաև «Նրե-վակ», «Արևելյան դար», «Արշալույս արարատյան» և այլ պարբերականներում: Մերժելով նրանց «թյուր, աղոտ և միտկանի կերպով» հայտնած կարծիքը, թե սահմանադրության խափանման պատճառը մամուլի, ավելի ճշգրիտ՝ դեմոկրատական պարբերականների չափից ավելի աղատ գործունեությունն է, այսինքն ծավալված քննադատությունը, Մամուրյանը պաշտպանում էր թե՛ մա-

20 Նույն տեղում, էջ 365: Ժողովուրդին միանալու և ազգու միջոցների դիմելու կոչ անելով, Մամուրյանը միաժամանակ ցավով նկատում էր, որ նա դեռևս պատրաստ չէ և սուլթանական պայմանները չեն ներում ավելի վճռական բայերի դիմելու, որ երբեմն ցուցաբերվում է նույնիսկ անտեղի երկշտություն: Իր հոդվածին նա կցել է այդ վկայող մի ծանոթագրություն: Սեյիմ փաշայի հետ մայր եկեղեցում, օգոստոսի 1-ի եղելությունների առթիվ բանակցելիս, լեփլեցուն տաճարում հանկարծակի խուճապ է առաջանում, «փախչող փախչողի կըլլան լեղապատար, կարճելով թե փաշային ձեռքի շարժումը գինվարական մեկուն՝ եկեղեցին դուրս պաշարելու հրաման մ'է»: Սեյիմ փաշայի «ձեռքի շարժումը ամբողջ բազմություն մը կղրղե և ցիւր ու ցան կրեն», — դառնորեն նկատում է Մամուրյանը, ապա ցավազին ավելացնում. «Թ՛ հայքս, եթև աստծու տաճարին մեջ այսքան քաջ ենք, հապա ի՞նչ դուրսագուններ սլիտի կտրենք պատերազմի դաշտի վրա...» (նույն տեղում, № 42, էջ 346):

21 Նույն տեղում, № 45, էջ 369: «Գարուն Հայաստանի». 1862, № 16, էջ 121—124: «Մեղուն». 1862, № 173, էջ 201—204:

22 «Ծաղիկ». 1862, № 45, էջ 369—370: Մ. Մամուրյանի առաջադրած այդ խնդիրը՝ Ազգային սահմանադրության պատմության ուսումնասիրության առումով, այսօր էլ արժանի է հատուկ ուշադրության: Անցած ավելի քան 120 տարիների ընթացքում, իհարկե, անհրաժեշտ մի շարք բայեր են արվել. պատմաբան Այ. Երիցյանը «Փորձում» (1877, № 1—4) հրատարակել է «Տաճկաստանի հայոց իրավունքը և նոցա սահմանադրությունը» պատմական արժեքավոր տիսությունը, Ա. Ալպույաճյանը լույս է ընծայել «Ազգային սահմանադրություն, իր ծագումը և կիրառությունը» հանգամանալի ուսումնասիրությունը (Ընդարձակ օրացույց ս. Փրկչյան հիշատականոցի. Կ. Պոլիս, 1910, էջ 76—528), Սարուխանը (Առաքել Սարուխանյան) տպագրել է «Հայկական խնդիրն և Ազգային սահմանադրությունը. Թուրքիայում (1860—1910)» (հ. 1, Թիֆլիս, 1912) ծավալուն աշխատությունը: Սովետահայ պատմագիտությունը իր հերթին պատշաճ անդ է հատկացրել հարցի նորովի ուսումնասիրությանն ու լուսաբանմանը (Հայ ժողովրդի պատմություն. հ. 5: Հայկական սովետական հանրագիտարան. հ. 1 և այլն): Անկախ այդ ամենից, արևմտահայ Ազգային սահմանադրությունը դեռևս կարոտ է մարսսիստական-լենինյան լայն ուսումնասիրության: Հարկ է գիտական միասնական կարծիք մշակել այդ կարևոր խնդրում:

մուլի ազատության իրավունքը և թե՛ Ազգային սահմանադրությունը՝ նրանց միացյալ հակառակորդները: Միաժամանակ նա բացահայտում է սահմանադրության խտրանման որոշ պատճառները և հակահարված տալիս արևմտահայ հետադիմությանը, ազգի այն «փոքր և տիրական մասին», որ գրոհելու առիթ որոնելով շարունակ որոգայթներ էր լարում ազգային օրենսդրության դեմ, ծավալում էր «ազգասպան» գործունեություն: «Մեր գիտցածը սա է, — գրում է Աշոտ-Մամուրյանը, — որ սահմանադրությունը ինքնին հին դրության խոստովատապարտությունն է, ազատ հրապարակության աջակից է»: Հարցի քննվող դիտակետից արվող այդ կարևոր հետևությունից հետո Մամուրյանն իր հոգվածն ավարտում է այս մեջբերումով. «Վասնզի մենք տեղ-տեղ կհարպենք և շատ տեղ (գթասրտությենե) կխնայենք անցյալը, այն սլալմանով, որ բարեհաճի մեռնելու եթե կենդանանալ, գլուխ տնկել ուղե, իսկույն դանի մեռնունելու չափ հետը կմաքառինք»²³:

Այսպիսով, Աշոտ ծածկանունով հանդես գալով, Մ. Մամուրյանը սկզբունքային դիրքերից ու հրապարակախոսական ակտիվությամբ արժարժել է սահմանադրական պայքարի հանդուցային հարցերը, լուսաբանել այդ պայքարի առավել թեժ էջերը, պաշտպանել առաջադիմական-դեմոկրատական մամուլի իրավունքները, մերկացրել սահմանադրության հակառակորդներին: Սահմանադրության դադարեցման ժամանակամիջոցին Մամուրյանի հրատարակած այդ հոդվածները կարևոր վավերագրեր են արևմտահայերի ազգային-սահմանադրական պայքարը ճիշտ ըմբռնելու և ապագա ականավոր հրապարակախոս խմբագրի գործունեության սկզբնաշրջանը ներկայացնելու համար:

НЕИЗВЕСТНЫЙ ПСЕВДОНИМ МАГТЕОСА МАМУРЯНА

М. Н. АКОПЯН

Резюме

Изучение журналов «Миутюн сахманадракан» («Конституционный союз») и «Цахик» («Цветок») показывает, что будущий известный публицист-редактор Маттеос Мамурян в этих журналах выступал также под псевдонимом Ашот. Его статьи, опубликованные в 1861—1862 гг., в основном посвящены конституционной борьбе западных армян. В статье прослеживается развитие демократических идей молодого публициста.

²³ «Ծաղիկ». 1862, № 45, էջ 370, 371, 372.